

նեին այցելելու ծննդկանին՝ նորածին երեխային չը կօխելու համար, ինչպես ծննդկանն էլ ինքը չպետք էր այցելեր նորապսակներին, նրանց չը կօխելու դավակներ ունենալու ընդունակությունից չզրկելու համար<sup>54</sup>: նորահարսը քառասուն օր չպիտի աման լվանար, խմոր հունցեր, ձեռքը կերակրի ամանի մեջ գցեր՝ չպղծելու, չհարամացնելու համար:

Այսպիսով առագաստ մտնողները կարծես մի մեղք էին գործած լինում, պղծված էին լինում շար ոգիների ազդեցությամբ: Պղծված էր և հանցագործ դարձած նաև այն որսորդը, որը որսի գնալու գիշերը սեռական հարաբերություն էր ունեցել: Այս դեպքերում սեռական հարաբերությունը նկատվում էր որպես հանցագործություն, մեղք, շար ոգու դրդմամբ կատարած գործողություն, ինչպես և որդեծնությունը, երբ ծննդկանից նույնպես պահանջվում էր քառասունքապահություն: Այս մտայնության հետ անշուշտ պետք է զուգորդվեր հրեական այն ավանդությունը, որ Եվային գայթակղեցնողը սատանան էր, որը առաջարկել էր արգելված ծառի խնձորն<sup>55</sup> ուտել: Այս ավանդության մեջ էլ ամուսնական սեռական մերձեցումը ճանաչվում էր հանցանք, մեղք, ուստի և ծննդաբերությունը:

Այն դեպքերում, երբ որևէ պատճառով եկեղեցական կամ նույնիսկ քորէնի մոտ կատարվող պսակը արգելքների էր հանդիպում՝ մեծ մասամբ չհասություն պատճառով, երբ քահանան հրաժարվում էր նաև քորէնի պսակ կատարելուց, զանգեզուրցին հեշտությամբ դիմում էր ապօրինի կնապահությանը, որից ծնված զավակները ըստ տեղական սովորության հասարակության աչքում այնուամենայնիվ վայելում էին ժառանգության բոլոր իրավունքները:

Վերջին տարիները, մինչև սովետական կարգերի հաստատվելը, երբ հաճախակի էր դարձել ամուսնու տանից երկարատև բացակայությունը, կողմնակի արդյունքով ընտանիքը պահելու անհրաժեշտության հետևանքով, ավելի հաճախացել էին և կնոջ կողմից դավաճանության դեպքերը: Վերադարձած ամուսինը կանգ չէր առնում կնոջը դաշույնով սպանելու կամ խեղդելու առաջ: Պատահել են և այնպիսի դեպքեր, երբ մայրը ինքն էր հովանավորել իր աղջկա դավաճանությունը փեսայի երկարատև բացակայության ժամանակ:

Ամուսնուն անհավատարիմ կնոջը հասարակության որոշմամբ ենթարկում էին հրապարակական խայտառակման: Նրա մազը խուզում էին, երեսին մուր քսում, նստեցնում էին էշի վրա դեմքը դեպի պոչը դարձած, բռնել էին տալիս պոչը սանձի փոխարեն և գուռնա-դավալավ շրջեցնում գյուղի փողոցներով<sup>56</sup>: Այսպես վարվում էին նաև անառակության մեջ բռնված տղամարդ ամուսնու հետ:

#### ՏՂԱՔԵՐԲ ԵՎ ՄԱՆԿԱՍԱԾՈՒԹՅՈՒՆ<sup>57</sup>

Դաշտանի օրերին կինը, թե՛ աղջիկ եղած ժամանակ և թե՛ ամուսնանալուց հետո, անսուրբ և պղծված էր համարվում: Նրան թույլ չէր տրվում այդ միջոցին խնօցի հարել, խմոր հունցել, հաց թխել և հաղորդություն առնել:

<sup>54</sup> Վաչագա՛ն:

<sup>55</sup> Հմմտ. խնձորի դերը հարսանեկան ծիսակատարությունների ժամանակ:

<sup>56</sup> СМОМПК, ВЫП. XXXIV, ОТД. III, էջ 205:

<sup>57</sup> Մանրամասն նկարագրությունը տե՛ս Լալայեան Ե., Սիսիան, 128—132, Զանգեզուր, էջ 85—91 և մասամբ Гедеванов М. А., Зангезурский уезд в медицинском отношении, «Медицин. с б-к», № 55, էջ 132—136.